



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tir_yimym



tir yimym

TAPAK 8

Ukraine-i maneni Russia den
raratsü: Tir Zelenskyy

Animesh Kujur-i asemtepba nung
otsü tasen ka yangluogo



VOL. XXII ISSUE NO. 311 (ADOK 311)

DIMAPUR

TENTONÜ (MONDAY)

LUROI (AUGUST) 25, 2025

₹ 5.00

Angh tasenba tenangzüktep agiba sentong nung kin pongu madentsü

Dimapur, Luroi/August 24 (TYO): Hombarnü angh tasenba, Ajay Kumar Bhalla tenangzüksü agiba sentong nung adentsü state sorkari jaokba nung kin pongu - Angami Public Organisation, Ao Senden, Lotha Hoho, Rengma Hoho aser Sumi Hoho - sanger madentsü, ta sangdong ka ajanga shi.
August 9 nü pangzüng renema

aliba ama iba telemtetba ya agi, ta 5 Tribes Committee on Review of Reservation Policy ajanga Deobarnü sangdong nung ashi.
Onoki tejangja temeden akhangba nung state sorkari maneni senzüka yutsüba ajanga ozü kin pongu sangeri state sorkar sentong nung shilem magitsüsa akumer, ta sangdong ajangasa ashi.

Ochi osang tejangja nüburtem nem agütsütsü ayongzüker: Y. Patton

Dimapur, Luroi/August 24 (TYO): Disputed Area Belt (DAB) nung kü inyakyim aser ni aliba indang meshidak angatettsüsa video clip ka prokshiba ni nguogo aser iba tatalokba indang jangjashitsür, ta Dy CM Y. Patton ajanga sangdong ka nung ashi.

shidak aser tzüzüing-ozüing shidak alitsü aser amshitsü tangatetba tajung nung inyaktar, ta Dy CM Y. Patton ajanga ashi.
Iba dak sendakba nung evection drive takok ngua inyakba asoshi Nagaland aser Assam Chief Ministers dang pelaba lemsateper.

Assam-Nagaland arütsü nung evection drive agiba tetenzük nungi ni iba ken o nung tetsüing ajemoka teti tensa asadanga arur. Tensa tejangja metettsü mechi July 24, 2025 nüa ni Wokha District kübok Ralan Area semdanga liasü. Iba mapang Liphayan village nung 40 Bhandari A/C nungi MLA Achumbemo Kikon, District Administration aser Police tem lia nüburtem den senden ka mena sepaitem tali yokba dak sendakba tebilemtsü nüburtemi lemsatapa liasü, ta ashi.

Ajisüaka Assam aser Nagaland arütsülen evection drive agiba sülen ni aser State sorkari arütsülen aliba teseitem mesemdang ta local media TV journalist kati tai tonglochtsüba angazüka kanga jashir. Item tai tonglochtsüba ya tamendak dak maka aser tejangja masü. Maneni media houses aser osangbener dang official sources nungi osang tejangja meteter adoktsütsü ajungshir, ta pai ashi.

Kasa anogo Niuland nunga ni shisadokden senden ka ayongzüka yangja tensa asadanga liasü. Tang teinyakdak evection drive tajungtiba nung agitsü mechi Assam aser Nagaland sorkar teka amteper osangtsüasang agitema inyaker. State anaprong nungi administration aser ozüing amshirtemi tesunep, inyakyim

Kuli tejangja makai shidak ama jembiba mesüra osangtsüasang mejangja prokshiba ajanga nüburtem mashi lenmangi aniba kisüing masü saka menüingdakba nung tebilemtsü adokdaksür aser nüburtem mangmangdaksür. Ochi aser tamang katettsü asoshi osangbeneri tongti shilem agir. Anungji nüburtemi aginüba ostü shidak osang abentsü imlar aser maneni yaritsü, ta sangdong ajangasa ashi.

Dy. CM Y. Patton yimya khukhua aitsür: KPC

Dimapur, Luroi/August 24 (TYO): Wokha district nung August 23 nü public meeting ka nung Nagaland indang Deputy Chief Minister Yanthungo Patton-i osangbener ka artsüba yimya ya kanga süngmanger, ta Kohima Press Club (KPC) sangdong ka ajanga ashi.

Iba ama dictator yimya amshia osangbener pei mapa inyakba nung tenük yokba onoki khukhua aitsür, ta KPC ajanga ashi.

Nüburtem den jembidang osangbener artsüba yimya ka kangadang tim masü, shibai osangbener ka pa mapa inyakba atema asüingdangba kisüing masü saka osangbener ka dang tuteta pa jakdang mamentsü mesüra pa (Patton) yangji lia iba tesemi marutsü ashi.

Osangbener ka ama ochi bushia tatalokba shidak nüburtem angatetdaksütsü asoshi asüingdangya asütsü ya ozü mapa lir.

Külem osangbener ka dang o tamajung shia yimjak nung merenshiba yimya ngua onok temulung animesüingzüker. Osangbener mapa shidak inyaktsüsa tensa agütsütsü ayongzüker, ta KPC sangdong ajanga ashi.

Nirmal Jain ken o nung DNSU shidak nokdaker: DUCCF

Dimapur, Luroi/August 24 (TYO): Nirmal Jain indang Indigenous Certificate dak sendakba mangatettep ken o nung tawa Dimapur Naga Students' Union (DNSU) ajanga tasü ita nokdaka arur. DNSU ajanga iba ken o jangjatsü aser shidak inyaktsü nokdakba yagi parnoki Nagaland nung lisopur asoshi ochi obendang bushiba kisüing masü saka asen temeden aser maitsü kümzüka ayutsü tongtipang ta angatetdaksür, ta Dimapur Urban Council Chairmen Federation (DUCCF) sangdong ka ajanga ashi.

Iba ken o mejangjai alirtem asoshi, Nirmal Jain indang

indigenous certificate nung mangatettep aliba ya nisung kar nem certification agütsüba tejangja masüba indang nung keta lir.

Iba tensa ajanga timtem agütsüba ya kanga ulura, koba ajanga applicants kisüing masü saka iba certificates amshiba nüburtem daka kongshir. Iba ama certificate nungya nisungba indang indigenous jenjangshidak aser ochi agütsütsüla, aser tejangja senmangren nung ajemdaker maongka aser temeden shidak agütsütsüla ta DNSU-i nokdakba ya shidak lir, ta DUCCF ajanga ashi.

DNSU ajanga indigenous

certificate ya Nagaland nung aliba sobaliba aser loktiliba meyong ta jangja-jangja ashir. Tim masüba nisung nem agütsüba anema parnok akang-akanga nokdakba ajanga lanu putu indang maitsü shidak amshidaktsütsü asoshi inyaker aser iba tangatetba ola asen lokti nung jangja-jangja lir.

Maitsü ya osettsüset ka ama aiben amshiba aser mashi lenmang nung amshiba lima ka nung DNSU ajanga lisopur ola mesamadaktsütsü meranger aser parnok senmangren akumtsübo aser wazüka ayutsü meranger, ta ashi.

(Maneni tapak 2 nung...)

Dimapur nung ZSUD longkak aittsü

Dimapur, Luroi/August 24 (TYO): Zeliangrong Youth Organisation Nagaland (ZYON) Zeliangrong Students' Union Nagaland (ZSUN) aser Zeliangrong Mipui Organisation (ZMO) den külemi Zeliang Students' Union Dimapur ajanga longkak aitba phase tanabuba nung shilem ka ama Dimapur nung August 25, 2025 nü longkak aittsü.

April 7 nü Pimla nung ozü adianutsür Kesutlungle tepsetba

dak sendakba nung Nagaland sorkar aser ozüing amshirtemi tanen makai mapa shidak meinyakba ajanga iba longkak ya aiter. Nisung meimchir memesük iba ama mapa tamajung inyakba ya tetsür ajunga anema inyakba lir, aser ochi obendang magütsü tashi ola adoktsü arok teinyaktsü lir, ta ZSUD sangdong ka ajanga ashi.

Iba atema Hombarne 9:30 ako nung Town Hall, Dimapur

nung adenshir memorandum ka agütsütsü asoshi Commissioner of Police, Dimapur indang office leni aotsü.

Anungji sub-units ajunga dang iba sentong nung shilem agitsü metetdaksür. Nenoki shilem agiba ajanga iba movement tashi itshiba kisüing masü saka tetsürtem temeden wazüka ayuba nung lungjemer nokdakba jangjashitsütsü, ta sangdong ajanga ashi.

AISGEF National Executive Committee senden nung CANSSEA aden

Dimapur, Luroi/August 24 (TYO): All India State Government Employee's Federation (AISGEF), National Executive Committee (NEC) Meeting ka Sukumolsen Bhavan, Faridabad nung August 15-18, 2025 anogotem alidang Confederation of All Nagaland State Services Employee's Association (CANSSEA) nungia tir Zubemo Lotha Tsanglao-i anir oa dena liasü.

Iba senden nung tawa AISGEF National Strike dak sendakba state report tatsüka, CMHIS kübok universal health insurance scheme, contract nung sorkar mapa inyakterem regular kumtsüba amala osangtem agüja liasü.

Women subcommittee meeting ka nung Joint Secretary, CANSSEA, Toshinaro Jamir-i tetsür jenjang, sibaliba sübo-solemtsü wazüka ayuba nung parnoki shilem agiba aser Nagaland nung tetsür employees inyakyim indang presentation ka agüja liasü.

Iba NEC senden nungya Central Pay Revision, Dearness Allowances, Health Insurance, health & Education, membership campaign & fees, Conference of Affiliates, Employees Forum Magazine & Literature, Library, Contractual Employees, National Conference, Cultural programmes, media cell aser constitution yanglushiba onüktem jembia liasü.

NEC senden nungya AISGEF mendenpur züingsem pezü shima liasü, kong CANSSEA tir Zubemo Lotha Tsanglao ya AISGEF secretaries tem rongnung ka ama aniok.

Ano NEC senden nungya August 16, 2025 nü K. N Umesh in Sukumolsen Bhavan ajanga AISGEF library ka semzüksü aser Arabindo Ghosh Centenary Lecture agüja liasü.

NESGETUF kübok North Eastern states tem nungi delegates tem AISGEF tir aser tongti zülur den senden balaka mena liasü.

Iba mapang North East nung employees dak sendakba ken o balala jembia aser taruba NESGETUF senden ya Meghalaya nung tekeraba nung alitsü lemtet.

RMSA tesayur nem itasen shidak agüjang: AKM

Dimapur, Luroi/August 24 (TYO): RMSA Teachers Association 2016 bhukuma Gauhati High Court ajanga March 16, 2022 nung obendang agütsüba aser kasaji Supreme Court-ia May 20, 2025 nü obendang agütsüba ajanga mapang shidak nung pay scale shidak agütsütsü akhangba ya tangsa-tang inyaktsüla kumogo. Iba obendang ajanga Nagaland RMSA Teachers Association 2016-i ochi nung akhangba awajemer, shirnok open competitive exams aser interviews ajanga shim, ta Ao Kaketshir Mungdang (AKM) sangdong ka ajanga ashi.

Iba telemtetba ya tesayur tem parnok mapa aser kaketshir tarutsü

jenjang yanglutsüba nung tongtipang shilem agiba asoshi kanga langa aliba tongtipang mera ka lir. Pay Scale shidak agütsüba ajanga parnoki shilem agiba junger ta agizükba kisüing masü saka 'teaching-learning process' tali tajungba kumdaksütsü aser tatem nung kaketshirtem ang ajangzüksü, ta AKM ajanga ashi.

Sorkari iba obendang akumtsüboa memonui inyaktsüla. Iba maparen maneni thinenba ajanga kanga temsüa aliba aser training shidak agir aliba tesayur telok ka ya tezü atangtsü, koba ajanga state nung education system nung timtem alitsü.

RMSA Teachers Association

bhukuma AKM nokdaka lir aser sorkar dang iba ken o nung temulung agüja court-i totuyuba agüja aliba ama tekeraba nung mapa kuma inyaktsü ajungshir.

Tesayurtem yimtung nung iba mechi longkak maitdaksütsüla.

Government High School tatidang results meilongi tajungba akumer, aser ibai talisa item tesayur temi bendanga agütsür meranga sayuba ajanga lir. Ajisüaka parnok aika March 2025 nungi itasen mangur, koba kanga tejashitsü lir. Tesayur tem yariba ya kaketshir tem yariba den sako lir, aser parnok dak senotsü indokba ya asen state tarutsü asoshi sen indoker asütsü, ta AKM ajanga ashi.

NDPP 29 Jangpetkong AC consultative senden menogo

Mangkolemba, Luroi/ August 24 (Agencies): NDPP 29 Jangpetkong Assembly Constituency general consultative senden ka Mangkolemba nung menogo, kong 2025-27 atema ketdangsürtem nominate asü aser tekübokba jenjang nung party inyakyim akangshitsü atema telemtetba tongtibang kar agia liasü. Iba senden nung MLA & Advisor for Transport & Technical Education, Temjenmenba-a dena liasü.

Senden nung o jembiba mapang MLA Temjenmenba-i, Chief Minister Dr. Neiphiu Rio aser NDPP State President Chingwang Konyak na dang 2018 Assembly election nung tokteptsü atema pa party ticket agüja Nagaland Legislative Assembly nung 29 Jangpetkong AC menden akokba atema kanga pelaba lemsatep.

Paisa, election atema ita pezü dang anunga lia nüboyimba sentong menor tenzüka bilemtetshia jembiba aser pa yimden yimsüsüba wadang nung tasen liasü ta ashi. Ajisüaka Chief Minister aser NDPP State tir, 29 Jangpetkong NDPP lenirtem, nüburtem-i bendanga agüja yariba aser Tsüngrem taochi agi pai vote aika ngua election koka liasü, ta Temjenmenba-i ashi.

Maneni pai, pa yimden



MLA & Advisor for Transport and Technical Education Temjenmenba den NDPP 29 Jangpetkong AC ketdangsür tasentem Nokyu Salang, Mangkolemba nung August 23 nü general consultative senden amenba sülen tangokba noksa nung angur.

yimsüsüba nung tasen asünung pa taoba küm ana tashi angazükba mapang liasü aser constituency terenlok atema inyakkdang party mapa sentoka toktsür asütsü akok ta ashi. Paisa, Chief Minister Dr. Neiphiu Rio-i teyari agüja pai unit ka dak alaka unit ajak nung terenlok bener arutsüogo aser unit ka ya-a LADP fund ajanga teyari agütsütsü, ta ashi.

MLA-i ashiba agi, August 23 nü NDPP 29 Jangpetkong AC atema tongtibangtiba anogo ka asütsü akok, kechiyong iba anogo tenure tasen ka tenzüker aser party asendenshia tashi itshir apusoba anogo ka lir. Pai, Chief Minister-i mapa balala benoka inyakba indang

metetdaksü aser talisang tawa linük balala semdanga aoba mapang lanurtem ajungkettsü atema Japan den tenangzüktepba yangluba indang metetdakja liasü.

Temjenmenba-sa, TFaMA (Task force for music and arts) inyakyim aser lanurtem ajungkettsü atema saisapong dak rangloker inyakba indang jembiba aser ashiba agi, NDPP aser state sorkar na lanurtem dak rangloker lir, kechiyong lanurtem ya Nagaland tarutsü lir.

Party tashi itshitsüba indang jembiba mapang pai, NDPP 29 Jangpetkong AC ketdangsürtem dang yimtsüng jenjang nung unit tem dak rangloker parnok tashi itshitsütsü atema inyaksü

ayongzüik, kechiyong party unit tem ya party indang sepaitem lir, shirnoki legislator tem shimer, ta ashi. MLA-isa, party lenirtem shirnok NGO balala indang lenirtem lir parnok dang political party aser NGO na mapa bendanga inyaksü mepeshi, ajita asünungdang parnoki sorkar inyakyim nung tetsükdaksü madokdaksütsü aser state nongiter kaka-ang akümtsü, ta ashi.

Pai, constituency nung tenüngdakba balala aser talisang Mangkolemba headquarter mozüki nung doctor agi anüngba, sorkar tenzükertem station nung maliba, lenmang majungba amala tebilemtsü indang jembiba

liasü. Item ken o tem ajak ya Chief Minister aser tanga cabinet minister tem den sensaksemogo aser pai MLA mapa metoktsüba mapang nungsa bentettsü, ta pai ashi.

Temjenmenba-isa, Mangkolemba nung angati medical camp ka ayongzüka agitsü atema benokba agizük aser camp takok asoshi takok tashi teyari agütsütsü nangzüka liasü.

Kasa mapang nung tir o jembiba mapang Aodangnok, shiba 29 Jangpetkong AC tir asütsü tanaben shimshia liasü, pai party tenzüker ajak dang party tashi itshitsütsü atema takokba tashi tajungtiba inyaksü ajungshia liasü. Pai ashiba agi, tang ya yimbazümalema alitsüba mapang ka masü saka saksalemtsüla, kechiyong MLA & Advisor Temjenmenba-i Constituency terenlok atema kanga meranga inyakdar, ta ashi.

Senden nungsa NDPP Secretary Mokokchung Region aser In-charge 29 Jangpetkong AC, Lanumeren; Working President 29 Jangpetkong AC, Imtiakum; President Women Organisation NDPP 29 Jangpetkong aser President Youth Organisation NDPP 29 Jangpetkong nungeria o tatsütsü jembiba liasü.

Patkai Christian College nung Freshers' Social mungogo



Mr & Miss Patkai tetoktepoba nung tetoktepertem sobaliba sobutsü semer tangokba noksa nung angur.

Chümoukedima, Lueoi/ August 24 (TYO): Patkai Christian College (Autonomous) nung August 23 nü "Genesis: A Journey Towards Excellence" omen nung ajemdaker Bundrock Auditorium nung Freshers' Social mungogo.

Sentong nung tongti o jembir Director, Higher Education, Government of Nagaland V Lovitoli Sema liasü. Lai ashiba agi, "iba anogo ya nü taküm nung tapak tasen ka tetenzüker lir aser lipok ya tenangzüka, terenlok aser tongutetbatem balala agi sünga lir."

Sentong omen ya kanga tajung aser iba ajanga kanga ajungmesor ta shia Sema-i, kaketshir tasentem dang parnok taküm nung journey tasen ka tenzüker, koba kakets shisatsü bushiba dang masü saka jirula, lokti terenlok daka sendaka lir, ta ashi.

HE director-isa, temaba jenjangi khenyongi dangbo majangzükteter, saka tanen makai meranga inyakba, angazüktsü mulunga aliba, angzüker alibatem magi kumdakja angazükshiba ajanga ajangzüker ta ashi.

Laisa, tanü asüng lima nung shiluyim ya kakets aser class takdang dak dang rangloker mali, ta ashi. Iba dak sendakba nung Sema-i, Patkai ya iba lenla nung renloka aotsü atema tetemsü tesem ka lir, ta shisem.

Ajisüaka lai, temaba jenjang atongtsüba kati ka den toktepba masü saka peisasa anogoshi tajungba kuma aotsü merangba dak sendaka lir, ta ashi

Kaketshir tasentem den jembiba mapang HE director-i parnok dang angazüktsü jangrabangra alitsü, tasüngdangba balala asüngdangtsü, shisatsü bushitsü, diversity akümtsübuttsü aser tesem tasen kati aiba mapang tembar yimteptsü ajungshia liasü.

Lai ashiba agi, taküm yagi kishi balala lapoktsüba maongka aser nisung ka tashi itshidaksütsü atema tetsükdaksütem aika bener arutsü. Maneni lai, college nung tajangshibattem yagi parnok career atema dang masü saka taküm liyonga aotsü atema renemtsütsü ta ashi.

Iba sentong tajung ayongzüka amungba atema kaketshir tejentem aser kaketshir lenirtem

nem tenügsang agüja Sema-i, Freshers' Day ya benjung ka dang masü saka tasenpurtema pelashishia agizüker ta temaitsü sayuba ka lir, ta ashi.

Sentong nung PCC Principal Dr. Thepfuvilie Pieru-i sentepa aliba lokti aser talisa kaketshir tasentem pelashishia agizük aser Students' Union PCC (SUPCC) tir Heme Sumao-i tir o jembiba liasü. Undergraduate fresher tem tenüng nung Sentijungla M-i o jembiba.

Sentong nungsa sobaliba sentong balala agi aser Margaret Shishak School of Music (MSSM) kaketshirtemia shilem agia liasü.

Freshers' Social nung tongtibang sentong kaji Mr and Miss Patkai tetoktepba ya liasü, koba formal session mapang introduction round agi aser tanungba session ya nikongtsütsü agia liasü.

Casual wear, formal wear, aser question-and-answer rounds sülen Yongkonglemba Chang aser Yume Doke na nem Mr aser Miss Patkai naroküm agüja liasü.

Akivi V Asumi aser Chingmi Khangrah na first runner-up liasü aser Chan-isa Mr Perfect title angü aser Chisile Hoi nem Miss Perfect naroküm agütsü.

Tetoktepba tetendangertemji Hikali Achumi, Miss Nagaland 2022 aser Miss Beautiful Smile Northeast 2023; Chanchui Khayi, Femina Miss India Manipur 2024 aser Mega Miss Northeast India 2023; aser Hangba Chang, I Am Model Search International Malaysia 2023 akoksang aser Mr Global Model India 2022 nungier liasü.

Kohima nung gari senzügenpongtsü tenokdangba kar agütsü

Dimapur, Luroi/August 24 (TYO): Kohima Deputy Commissioner office sangdong ka ajanga, Kohima jila nung gari senzügenpong tajungba azüoktsü atema jila nung commercial taxis tem senzügenpong masütsü tenpokdangba kar agütsüogo.

Tetuyuba nung ashiba agi, commercial taxi tem ya angoshia anepdang 9 ako nungi nikongtsütsü 5 ako tashi Lower PWD Junction nungi ir Oking Hospital anasa Middle Midland Junction nungi adoktsü memelatsü.

Deputy Commissioner-isa, nüburtem tejangraba apir iba tetuyuba ya agütsüogo ta ashiba den nüburtem dang iba inyakyim ya takok ngua benoka inyaksü atema ketdangsürtem den teka amteper inyatsü

mepshia liasü.

Kasa mapang nung DC-isa, Jail Colony, Ward-19 kübok Fira Hotel nungi Assamese Church tashi nung lenmang ya 'No Parking Zone' asütsü ta metetdaksüogo.

Kohima jila nung temelaba magi lenmang tezülen gari mashi mashi anenba ajanga gari senzügenpong nung tetsükdaksü adokba ajanga iba tetuyuba ya agütsüogo.

Deputy Commissioner aser Regional Transport Authority, Kohima mendenbuba, B. Henok Buchem-i, iba tetuyuba sülen manidaki gari kar danga iba lenmang nung anena aliba ngura bener oadoktsü aser Motor Vehicles Act, 1988 kübok Section 179 dak ajemdaker tapet temerenshi agütsütsü, ta metetdaksüogo.

Nirmal Jain ken o nung... (TAPAK1NUNGI...)

DNSU ajanga inyakba ya asenoki zübazüyima meyutsütsüla. Indigenous certificates jangjatsü asoshi nokdakba ya paperwork kisüng nung metembanger, ibai ochi obendang, asen teinyaksü aser asen maittsü balala shidak agizüka amshiba indang lir. Kaketshir tentet ajanga iba ama tongtipang ken o nung nokdakba ajanga parnok ya tongtipang ta tali jangjatsür aser lokti ajangzüksüsa mera tajung agitsü nüngdaker, ta ashi.

Anungji DNSU-i tebilemtsü benokba ya tekeratiba nung bentettsü asoshi ajungshir. Ibai kaketshir atema kisüng masü saka asen lisopur telungjem asoshia tongtipang mapang ka lir.

Nirmal Jain indang indigenous certificate dak

sendakba ken o ya ochi nung bentettsüla aser Nagaland nung lisopur ajunga temeden aser maittsü wazüka ayutsüla.

Nirmal Jain tai malinungbo pa ola adoktsüla aser pa nokdakba kuli tejangja sayutettsüla. Iba ken o nung DNSU ajanga tatishitsü tajung sayogo aser iba maparen nung onoka parnok den nokdaker, ta DUCCF sangdong ajangasa ashi.

District administration dang indigenous certificate kanga kumdanga agütsütsü shijen ashir. Tarutsü nung metokmeperi majurutsü asoshi iba ama certificates ya ochishia agütsütsü nüngdaker. Anungji district administration dang Nirmal Jain indang indigenous certificate ken o tekeraba nung bentettsü ajungshir, ta DUCCF ajanga ashi.



August 24, 2025 nü Bengaluru nung aliba Freedom Park nung shiruru meimertemi longkak aitiba noksa nung angur.

Sen magütsü tashi Haryana nung Ayushman Bharat service malitsü

Panipat, August 24 (Agencies): Haryana nung nija hospital temi August 7 nungi tenzüka Ayushman Bharat scheme kübok treatment magütsür, aser sorkari iba scheme kübok tagütsütsü aliba sen ajak magütsü tashi doctor temi longkak aita iba scheme kübok service magütsütsü, ta Amongnü Haryana nung Indian Medical Association (IMA)-i metetdaksü.

Panipat densema state tesem ajaklen nija hospital temi August 7 nungi tenzüka longkak aita Centre sorkar indang health insurance scheme kübok treatment magütsür.

IMA-i ashiba agi, iba scheme kübok tang tashi nung sen crore 490 tagütsütsü lir, aser senotsü tesadang shi dang agütsüba agi maneni longkak aiter.

Amongnüa Panipat yimti nung IMA züngsemtemi longkak aita, sorkari health workers aser shirangertem naprongla sendoker, ta aitsü. "Health workers aser nübur napronglai Ayushman Bharat scheme agi melung masür. Senotsü teladak süa agütsütsü atema association den jembia inyakyim melatet tashi hospital temi iba scheme kübok treatment magütsütsü," ta IMA otongdari metetdaksü.

"Sorkari hospital tem amokmerenba anentsüla. Senotsü shilem ka dang agütsüba jagi meperi. Iba denji külemi parnok tsütsülen nungi süoki ia tongtepratep masü," ta pai metetdaksü.

State Health Minister, Aarti Rao-i, hospital temi junga meshisadangi inyaker, ta ashi.

Panchkula nung Dr Kuldeep

Mangla-i, "Hospital temi yamai maneni inyaksü ya kanga tasak. Senotsü tangutsü alibaji maneni atatsü tasak. Shirangertem-a timtemer, aser iba ya talisa sorkar tai ajanga lir," ta metetdaksü.

Haryana nung nija hospital 650-i Ayushman Bharat services anenogo aser ibaji ajanga nisung crore 1.5 shi kongshir. Iba scheme kübok services anenba agi shirangertem aika sorkar hospitals-i aotsüsa akümer.

Nija hospital temi ashishiba ken otemji bushisüngdangtsü atema Chief Minister Nayab Saini-i committee ka tentetsü, ta sangdongogo.

IMA-i, iba scheme kübok senotsü inyakyimji teladak asütsüla aser mapang shidak nung senotsü agütsütsüla, ta takhangba agütsür.

Fiji Ato kilonser Sitiveni Rabuka-i India semdang

New Delhi, August 24 (Agencies): Amongnü Republic of Fiji Ato kilonser, Sitiveni Ligamamada Rabuka aser pa kinüngtsü, Suluweti Rabuka na New Delhi tonga aruogo; tenati anogo pezünü India semdang.

Amongnü Indira Gandhi International Airport nung Union Minister of State for Education & DoNER, Sukanta Majumdar-i Fiji Ato kilonser agizüka liasü.

Ministry of External Affairs (MEA) otongdar, Randhir Jaiswal-i X ajanga, Fiji leniri

semdangba ajanga lenla aika nung linük ana tesendaktep ano tajungba akümtsü, ta metetdaksü.

Jaiswal-i, "Fiji PM Sitiveni Rabuka-i tang mezüing India semdang. MoS Education & DoNER Sukanta Majumdar-i airport nung PM Rabuka agizük. Leniri semdangba ajanga India-Fiji tsüngda sector aika nung tesendaktep ano tajungba akümtsü," ta metetdaksü.

Rabuka-i New Delhi nung Union Cabinet Minister ka den senden amentsü aser August 25

nü pai Rajghat semdanga akhüm agütsütsü, iba sülen Hyderabad House nung Ato kilonser Narendra Modi den senden amentsü.

Lenir ana senden amenba sülen tezüngzüktep kar agitsü, iba sülen külem sangdong agütsütsü. Kasa anogo nung Rabuka-i Tir, Droupadi Murmu-a ajurutsü.

August 26 nü Fiji leniri Indian Council of World Affairs-i ayongzüka sentong ka nung jembitsü aser August 27 nü meyipa aotsü.



August 24, 2025 nü New Delhi nung 'All India Speakers Conference' tetenzük sentong nung Union Minister ana- Amit Shah aser Kiren Rijiju na den Delhi Lieutenant Governor Vinai Kumar Saxena, Delhi Assembly Speaker Vijender Gupta aser Delhi Chief Minister Rekha Gupta nunger tangokba noksa nung angur.

PM Modi-i Ukraine Tir Volodymyr Zelenskyy India-i jaoker

New Delhi, Luroi/August 24 (Agencies): India semdangtsü atema Ato kilonser Narendra Modi-i Ukraine Tir, Volodymyr Zelenskyy jaokogo, ta Amongnü Ukraine Ambassador Oleksandr Polishchuk-i metetdaksü.

Ukraine National Flag Day anogomong nung Ukraine Ambassador-i, "India semdangtsü atema India Ato kilonseri Zelensky jaokogo. Iba atemaji linük anapronglai jembishinüa inyakdar. Tir Zelenskyy-i atangji India semdangtsü onoki imlar," ta metetdaksü.

"Ibaji linük ana tsüngda tesendaktep nung alizüing ka tongtetba asütsü. Onoki anogo ka shimtsü atema merangdar," ta paisa metetdaksü.

Polishchuk-i, 2023 küm nungi Ukraine aser India na tsüngda tongtepratepa alir, ta ashi.

Ato kilonser Modi-i, Ukraine rara dak sendakba nung India tangatetbaji 'neutral' masü saka

yimtenren ken o jembia yimjung atema inyakba pusemer, ta ashibaji Ukraine-i pelaa agizüker, ta Polishchuk-i metetdaksü.

"Onoki India dang kanga pelar, Russia nungertemi amak tenzüka anogo nungi India-i parnok tangatetba lemsatepogo. Tawa Ato kilonseri yimjak nung, India ya neutral linük ka masü ta shiogo. Ukraine nung yimjung atema India-i yimjung ken o jembiba nungiter ta shiogo," ta Polishchuk-isa metetdaksü.

Paisa India dang Russia-Ukraine tsüngda rara anentsü atema maneni tongtibang shilem agidaksüner, kechiyong Ukraine-i yimjung ken o nung India ya tongtibang linük ka ama züngshir, kechiyong India o Russia na tesendaktep kanga junga lir, ta metetdaksü.

Honibarnü New Delhi nung aliba Ukrainian Embassy nunga Ukraine National Flag Day monga linük wako songa sentong ka agiogo.



August 24, 2025 nü Jammu nung tzünglu sashia aruba sülen IIIM Hostel nungi kaketshirtem kümzüka anir aoba noksa nung angur.

EC-i SIR ajanga Bihar election nung vote auyatsü: Rahul Gandhi

New Delhi, August 24 (Agencies): Amongnü Congress lenir aser Lok Sabha nung opposition lenir Rahul Gandhi-i, Bihar nung electoral roll indang Special Intensive Revision (SIR) ajanga Election Commission-i vote auyatsü meranger, ta aitsü.

"Bihar nung SIR ya vote auyatsü atema reju amai kümdaksüogo. Voters lakh aika tenüing agienogo; Opposition-i tashishiba agütsür, ajisüaka BJP-ibo khen danga tashishiba magütsü, kechiyong Election Commission, Election Commissioner aser BJP tsüngda longjemmer inyaker," ta Rahul Gandhi-i metetdaksü.

Araria nung osangbenertem senden nung jembidang Rahul Gandhi-i, "Bihar telung nung voter list nungbo 'süadokogo' ta sangdongba nisungtem onoki taküm angur aser parnok votes agienadokogo. Tanurtemia 'vote auyartem' ta jembir. Election Commission of India-i tanurtem den jembitsüla," ta ashi.

Osangbenertem senden nungji JDU lenir, Tejeshwi Yadav-a liasü.

Vote Adhikar Yatra dak sendakba nung Rahul-i, "Iba Yatra ya kanga takok ngua agidar aser nisung aikati iba sentong nung shilem agir. Onoki 'vote chori' indang jembiba ya Bihar nung nüburtemi agizüker. Voter list shidak agütsütsüji Election Commission teinyaksü mapa lir, ajisüaka parnoki Maharashtra, Haryana aser Karnataka nung yamaji meinyaktet. Onoki EC dang inyakyim melenshitsu akhanger aser onoki manentsü. Bihar nung vote auyatsü atema onoki temelaba magütsütsü," ta metetdaksü.

Ato kilonser Narendra Modi-a aija pai, "Ato kilonser Modi-i SIR ajanga Bihar nung sensakertem meyong vote auyanar," ta ashi.

RJD lenir Tejashwi Yadav-ia, "Election Commission-i BJP pusemer, ibayongji BJP-i Parliament nung iba bill (130th Constitution amendment Bill) ya benok. Chief Election Commissioner kümzüker, aser ibaji pa anema ken o benokba nokdangtsü atema lir," ta ashi.



TIR YIMYIM YIMOBILEM (EDITORIAL)

DIMAPUR MONDAY, AUGUST (LUROI) 25, 2025

Ungma takok

Ungma nung yakanü Ao Senden ajanga Forum for Naga Reconciliation (FNR) teloki Naga nunger yimten telungjem senden ka ayongzüka akabaji , Naga nunger yimten nüchiso bushiba otsü nung tongtibang tesem aser anogo asütsü. Atangji, Ungma senden nung Naga yimten nüchiso jenjang lateta aotsü atema inyaka aotsü sentong aser mapang latetbabo kecha mangur saka o agidang alima nung kecha tashia agia Naga nunger telungjem aser tejangraba meraksatsütsüsa inyaka aotsü mulungtetba aser lemteta akabatem akangshiba dang angur . Ajisüaka, tanü tensa Naga nunger asoshi iba ama longjema alitsü lemtettsü asoshi tesem ka nung telok ajak külemi ajuruteptsüabajia mapa temela masü. Iba ama meputep aser tebenja aliba Naga nunger tensa tiaji asenoki angatetra, atangji, Ungma nung FNR aser Ao Senden nati Naga nunger kin 34 den Naga yimten nüchiso bushir telok tapu 16 arua adentsüsa senden ayongzüktetbajia Naga nunger ajak asoshi takok tuluka asütsü. Aji oda, Naga nunger taginüba aser teyongyaba angateta Ungma yimtenia tenla tulu agüja Naga nunger par yimti nung adenshidaktsübaji, temenungratsüka, tanü putu ait nung alirtemi mangu aser mejangjai alitsüa akok, saka Naga nunger India kübok melinü yimten nüchiso jenjang balaka latettsü asoshi nokdakba asoshi India sepaitemi Naga nunger ajak ayako dena reshikangshiba mapang , Naga Peoples Convention (NPC) senden tanabuba Ungma nung 1958 küm ayongzüka akaba anogo aser otsü tanaben lephsia arur amai angur. Aji oda, alima sobaliba ajangshirtemi ashi ama, alima nung süren otsü ajak ya tanaben kasasa lephsia arur aser aji shitak ta asütsüsa, tanü Naga nunger kodamasüba tensa tia ka nung, küm 67 buba nung Naga kin aser yimten telok ajak külemi tanaben Ungma lima adenshia telungjem ken o tajung jembia, Naga nunger tarutsü asoshi tesünep yimten jenjang tajung ka latettsü shisalemsateper senshibaji , Naga nunger alizüing ka atongsü anasai arur amai bilemer. Aji oda, küm 68 jakdanga Naga yimten jenjang ka latettsü asoshi mezüingbuba NPC senden 1957 küm August 23 amshia Kohima nung amenba angur aser kasa anogo nung tanü Ungma nung kasa ken o lephsia jembitsüsa Tsüngremi Naga nunger nem taochi mapang tanaben agütsür asütsüa akok. Aji oda, küm 66 jakdang, Ungma nung Naga nunger adenshia jembiba yimten ken o dak amendaker, tanü aginüyonga maginüyonga, Nagaland state alangtet süra, yashi Ungma yimti nung Naga nunger lungjemmer inyaksü kenbang obang medemshiba ken oia , memenui, asüing mapa küma ataloka angutsü imlar. Atangji, tangar Naga kin aser yimten teloktemji yutsür, FNR aser Ao Senden asoshi balaka Ungma senden nungi tenzüka Naga yimten ken o telatetba tajung kati maru tashi khena maneni jembipet jembia aotsüba sentong renemtsü kanga nüngdaka kümogo. Aji oda, Ao Senden aser Ungma yimten asoshia Ungma nung senden katetbaji maongka dang nungibo Naga nunger asoshi yimten khuret abentsü mapa-ang tuluba agizükogo. Tanü ajak asoshi tia majung, tang amai Naga nunger asoshi telungjem aser yimjung indang jembili, telemsa-ang tali adokli ta adoka-adoka tangbo Naga yimten nüchiso bushir telok 16 dak tali küma aobaji temenünütsüka masü, shisabolutsüka lir. Item teloktemjisa aija kazü nung majungtsü, saka itemji tang amai karibosa bendanga agüja anepalua ayongdentsüla aser telok tenüing ka mesütetaka, Naga nunger ta asüba tenüing nung ka kümer, tesem ka nung ajurutepe, tanü tensa dak apet, Naga nunger yimten jenjang ka latettsübaji kanga nüngdaker. Iba mapa aser sentongji ano asentenshir Ungma senden nungi tenzüka FNR teloki Naga lima tesem balala nung jembia aotsü imlar. Atangji, tensa kanga majungba mapang bendang lima tesem balala nung FNR teloki anir Naga yimten teloktem ajurutepdakja jembiba agi, tanü asenok ka küma melungjemtetaka, azü tokshibabo anenogo. Joko, Naga nunger yimten asoshi Naga lima nung jembitettsüsa tensa mapang ka yanglutetbaji nisungia kanga meranga inyakogo aser Tsüngremia kanga yariogo ta bilemdi. Kasa, tangatetba nung Tsüngrem dak amanga asenoki tezümedangi meranga inyaksü ajungshitepdi.

OLEMSABANG

OSHI YA KIN KA AYAK LIR

~ L. Kika Pongener.

(Yashi adok nungi...)

Tanü putu ya linuk aika nung; pei kin oshi yimsoshiba mapang ka lir. Kin aika pei oshi tarokba bushia wazüka ayutsü merangba mapang ka lir. Ajisuaka, kanga tesasatsüka, asen Ao kinbo asen oshi sapua mejembi-i sentokba mapang ka lir. Aser ano kanga tesasatsü kaji....Ni aibelener ka mesura, asen Ao kinbo tanu tashi asen oshi nung University level tashi nung 'Doctorate' agitsüsa Course adokteta mali. Tenymia kinbo par oshi nung University level tashi nung Doctorate agitsüsa adokteta kar. Asen Aorbo ano tang tashi zülumen (Spelling)-a lirumedema mezüluteter; tezülur ajaki pei zülunutsü dang züluteper. Zülumen liromedemtsü atema ASLB-i Aor kaket zülurtemi züluba kaket ajak kanga junga repranger temelaba agütsünungdang; kaket küma adoktsü lemteta lir. Aji oda, ASLB-ia küli küptok masü, saka nendak-nendaka zülumenji kanga tenuk zünga reprangtsüla. Ano kaket zülur aser osangkaket nung ocet zülur ajaki; zülumen (Spelling) ya pei sasa shitaka ta bilemba nung masü, akokba tashi Arok osep, Ao laishiba aser Ao ken kaket den medemdanga lirumedema zülutsü merangtsüla. Oshibo ka dang sernung zülumen balala sura tashishitsü aketba oshi ka asütsü.

Ano tang koba Arok osep adoka lir, iba atema asen Aor ajaki kanga peladi aser teinyaker nem tenungsang agütsüdi. Kechi mapa sudir suaka, noklang nung noklang tabensabo masütsü, metokmeperi aser mabensaba karbo alitsü. Ano kangasa pelaba kaji....Asen Aor rongnungi asen Ao oshi tarok metetertem; yimtsü-yimpo shirnoki Arok osep nung mabensabatem bushiteta aser merajemi rateta alibatem; metongshia mapang shia osangkaket nung lemsateper....Ibajia kanga pela-a agizüktsüla aser taruba adoknung ajakji enoksemer, tabensaba melenshia yanglushir adoktsü bilema alitsüla. Asen Aor dak tashimait kaji....Pei-i bilemba aser angatetbaji dang shitak ta ammetba shisatsü aika dak keta lir. Ano tashimait tulutiba kaji....Onoki jembiba ya dang shitak....Ibaji dang jembitsü, zülutsü, amshitsü aser agitsü....ta tekong meranga ammetba; ashiko, lennir kar dakbo alitsü akok. Anungji asen kija ajungtsü bilemba; asen telok kija ajungtsü bilemba; mesura asen teloki amokbangtsü bilemba aser merangba....Ibala shisatsü aser tangatetba malitsüla. Aotsür Aor Scholar-tem, Theologian-tem aser tashi-tawartem....Koba nung Aor ajak lirumedemtsü aser longjemtsü (?) Ibaji dang ajaki bilemstüla. Asenok tejakleni aoba kin ka ama asenok tebilemba aser tangatetbaji temesu masü kanga tesadem asütsüla.

Asenoki asen sobaliba ya yi agi mesepa jemteper, sujak/langdem demer manglong (Naked) Hoi....Hoi....ta yar-tsüngsanga, ki maktepa, tetsü-tebou ken atenba....Ibaji dang asen sobaliba amai bilemer; saka sobalibaji yartsüngsang, kimakba, tetsü-tebuo ken atenba ibaji dangbo masü. Pei kin oshi shitak jembiba, jaya-jako tajatsüyim shitak ajaba, kin-kidong telembuyim shitak kiba-lembuba, lilaliruyim shitak libaliruba, tantsü-tambu dang akümtsübuba, bangdak küpok tashi angaa aliba, azümesen mesui mapa meranga inyakba, ashi-külak aser ashi-auya mesui kümdanga azüoka aliba; achi-ajemba nung ashiteta aliba; ano aika lir....Itemji asen sobaliba tajungtemlir. Aser sujak/langtem demer manglong (Naked) tsüngsangba....iba yabo melenshitsüla....Kechiyong iba ya tanu putu den mapet. Yar-tsüngsangjibo wazüka ayutsüla. Ano yim kati yim ka amakba nok ken atenba....Iba melena yimli ken tajung aser yim o yim na akangjongshitepba ken atentsüla. Ano yim kati yim ka amakdang mangko alepba; iba konang-naroküm naroka yim tenungji tetshia nisung tenung ajaba....Iba ya tanu putu nungbo mebenshitsüla. Iba yagi yim o yim na tsüngda tanaben tsükchitep tenzüksü ana nung lir. Mekümdangra, sobaliba wazüka ayur ta asüdang; meyiper akhi tsürabur mapang letpet-tsüngtepbato tanaben shiloba bener arutsü. Aji oda, asen sobaliba wazüka ayutsüba nung ya tekümdangtsü kar lir ta ajiteter. Anungji asen sobaliba asüyongjia tamajungbo endoktsüla....Aser tajungtem shimteta tajungba küma yanglushir benshitsüla aser wazüka ayutsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Archaeologist temi UAE nung küm 1,400 tejaklen aliba Kangki ka angu



United Arab Imirates (UAE) kübok Sir Bani Yas asetkong nung archaeologist temi ngutetba Kangki noksa nung angur.

August 24, 2025: Archaeologist temi United Arab Emirates (UAE) kübok Sir Bani Yas asetkong nung akhidang aliba monastery ka nungi Kangki tejen ka ngutetogo; iba Kangkiji küm 1,400 tejaklen Khristantemi amshiba asütsüa akok ta bilemer.

UAE yimtiba, Abu Dhabi nung Department of Culture and Tourism (DCT)-i archaeologist temi iba Kangki ngutetba osangji sangdonga liasü.

Iba Kangki ngutetba ajanga Aso 8buba mapang nung Arabian Peninsula nung Khristantem aliba jangjar.

Sir Bani Yas asetkong ya

Abu Dhabi nungi kilometer 170 shi pilar lir, aser tangbo iba asetkong ya ozü sangnu aser arem shiruru wazüka ayuba tesem ka lir.

1992 küm nungi tenzüka iba asetkong nung archaeologist temi ali tua bushisüngdangba maparen tenzüka liasü. Iba sülen Archaeological Survey (ADIAS)-i Tenla ki ka aser monastery aliba tesem ka ngutetogo. Iba monastery nungji Kangkiji ngutet.

Plaque ka nung aliba Kangkiji metong nung 27 cm lir, aser iba Kangkiji tamalen Iraq aser Kuwait nung tutetba Kangki dang nungi tera

tuluba lir.

Iba Kangki nungji tou noksa keta lir, aser ibaji Yisu Khrista Kangki nung metaba tesem Golgotha temaitsü lir, ta archaeologist temi bilemer.

Mongintemi iba Kangkiji putirtemi amshiba asütsüa akok, ta bilemer.

DCT Abu Dhabi nung Chairman, Mohamed Khalifa Al Mubarak-i sangdong ka ajanga, "Sir Bani Yas asetkong nung akhidang aliba Kangki ngutetbaji ajanga UAE nung yimsü balala amangertem aser sobaliba balala agizükteta nüburtem külemi tesünep nung aliba jangjar," ta metetdaksü.

Gaza nung ayawara ajanga nisung jenti asütsü: Christian Aid



August 24, 2025: Khristan melungtet telok, Christian Aid-i, Gaza nung tekeraba nung rara manenra aser teyari agütsüba lenmang nokdangra nisung jenti yaseta asütsü, ta metetdaksü.

Christian Aid-i, Gaza nung nisung 269 bo yaseta süogo aser parnok rongnung tanur 112 densema lir, ta metetdaksü.

UN-i nungitba Integrated Food Security Phase Classification (IPC)-i tan hopta Gaza City nung ayawara tensa sangdonga liasü, aser iba tensa ya nisungi sayangtetba lir, ta metetdaksü.

IPC report ajanga, "Ita 22 tashi maneni raraba sülen Gaza Strip nung nisung million tesadang shibo aya-tzüra tensa nung lir," ta metetdaksü.

Israel-ibo Gaza nung ayawara aliba osangji tai ta shiogo.

Israel Ato kilonser Benjamin Netanyahu-i, "Israel nunger ayawara indang policy mali," ta metetdaksü.

Christian Aid nung Israel atema Programme Manager, Katie Roxburgh-i, IPC-i Gaza nung ayawara tensa sangdongba nungji tesüngmangtsü kecha mali, ta ashi.

Laisa, "Gaza nung alirtemi parnok ayawara tensa nung alir ta meteta dang lir," ta ashi.

"Gaza nung ita aika anogo shia 'soup' tera dang jema taküm aliba tekangshiji külem inyakertemi lemsatepogo," ta lai ashi.

"Nisung aika ayaba agi tashi lulaa asür aser chiyungtsü peria machiba agi kou tsüdoker," ta laisa metetdaksü.

Iba tensa atema lai Israel aitsüba den külemi Israel-i Gaza

ANOGO ABEN TSÜNGREM DEN

Tsüngremer mulungba Tsüngremi akoker 2 Kor. 9: 6-15

Aser ajak nung teti nenok onsara teperi aka nung, mapa tajung ajak nung arentsü asoshi, Tsüngremi nenok nem taochi ajak rendaktsütsü akoker. 2 Kor. 9:8

Asenoki mapa sentong tapu balala aika yanglur. Teimla tulu nung tenzüker saka yimlaba ama mesüi atemer. Nisung shia dak tashi mait lir. Shingaia pai/lai inyaknüba ajakbo inyaktsü makok, anungji asenoki asen tejangraba asen tashi den putepa dang ayutsüla.

Meimchir tashi maittem den medemdang nung, Tsüngremi Pa nükjidong temulung lemteta inyaktsü akoker. Mezüngbuba pa tashi tendangtsü menüngdaker. Nisung teimbai Tsüngremi akoker ta nangzüker.

Iba jagi asenok koda yarir? Tsüngrem tashi aser nisung tashi mait nung kechi tetsüngda adoka lir, ibaji jungteptsü asoshi Tsüngremi lenmang ka bushiteta lir aser ibaji taochi lenmang. Pa taochi agi Pai asenok tashi mait angatetter, aser taochi ajanga Pai asenok yaritsü asatet. Temeim agi asenoki makokba Pai inyaktsü. Asenok alangzüksü asoshi Pai pei chir yok.

Pai asenok meim nung taküm tia aika nung Pai Pa teyari asenok nem agütsü. Pauli ashir, "Tsüngremi ne nüngdak dang tali agütsütsü akok". Kasa Tsüngrem shibai Paul anogo nung inyak tanüa asenok dak aser asenok ajanga Pa taochi rendaktsütsü akoker.

Sarasadem : T emeim Kibur, Nai onok ajanga atalokdaktsütsü akokba mapa tajung aser tulu bushitsü onok dak ajungshiang; Yisu asoshi. Amen.

Alima tesem ajaklen Arogotemi Ukraine atema sarasademtsüogo

August 24, 2025: Tawa World Council of Churches (WCC)-i ayongzükbba ama Amongnü (August 24) alima tesem balala nung Arogotemi Ukraine nung rara anentsü aser yimjung alitsü asoshi sarasademtsüogo.

Tan hopta tetenzüklen Pope Leo XIV-ia Catholic Khristantem dang Gaza nung rara anentsü atema August 22 nü lumia sarasademtsü ayongzüka liasü.

WCC-i, Ukraine nüchiso anguba sülen küm 34 ajungba anogomong (August 24) nung Ukraine atema sarasademtsü ayongzüka liasü.

Ukraine nung rara anentsü atema sarasademtsüba dak alia Khristantemi alima tesem balala nung rara alidak Khristantem kümzüka alitsü aser reshikangshiba Khristantem yarirtem atema sarasademja liasü.

Ukraine rara nung yimsü

dak sendakba kiojen 700 dak tali raksatsüogo aser Russia sepaitemi Ukraine nunger pastor aser putir 70 dak tali tepsetogo.

Amongnü Arogotemi Russia sepaitemi apuba Ukraine nunger tanurtem atema-a sarasademtsüogo.

Russia-ibo, tanurtemji taküm kümzüksü atema parnoki tesem aienshidaktsü ta ashir, ajisüaka Ukraine-ibo, Ukraine nungi tanur 19,500 dak tali tashiyim amshia Russia mesüra Russian-occupied territories-i anir ogo, ta metetdaksü.

Item tanurtemji tangartemi pei tanur ama agir, re-education camps nung ayur mesüra kangshia Russia senso agidaktsür. Ukraine aser International Criminal Court (ICC)-ibo itemji rara mapang ozüng alema inyakba lir aser 1948 UN Genocide Convention kübok ozüng alema inyakba lir, ta aitsür.

AO OSHI ANGAZÜKDAK:**TANÜ ANGAZÜKTSÜBA OJANG****Tesümgangtsü**

(adv) angatettsü makokba mapa, tamamangtsü (wonderful)

* Tsümgremi inyakba mapatem ya tesümgangtsü.

Tesümgzük

(n) anibelem nungi mesüra jashia aliba anenba(consolation, rest)

* Ojala jashiyonga tesümgzük temela liasü, tangbo la tesümgzük limai ogo.



Tir Yimyim

OLONG PAITEP # 7250

1			2		3		4		5
6		7							
					8				
9				10					
						11			
			12						13
	14							15	
					16				
			17						
								18	
19									

TIPIEN

2. Teburtemi tejak nung awaba

-(8)

6. T _ _ _ em

-(3)

8. Tzüik ayudak

-(3)

9. Nüngdakba dang timba

-(6)

11. Züina ao

-(4)

12. Yangi tzu angur

-(5)

14. Tangar dang nungi tali

-(4)

16. Senyong masü

-(6)

17. Oadokdi

-(3)

18. Tzü tarok

-(3)

19. Yimtaklir aikati iba ya ki den

külemi yanglusemer

-(8)

LANGTSÜNGLEN

1. Temejangdak

-(6)

3. Nisung ka mapa inyaksü nübo

-(4)

4. Azüntsü asoshi mejemba

-(6)

5. Tesangwa agütsüba

-(5)

7. Tila masü

-(4)

10. Tebenjem tetsür chanu

-(4)

11. Tekolak nung inok

-(4)

12. Tetsünga

-(6)

13. Tangar inyakba ka inyak

-(6)

14. Tim masü ta ashi

-(5)

15. Asalendong

-(4)

16. Tanüdagtsü

-(4)

OLONG PAITEP # 7249 TELANGZÜBA**TIPIEN :**

1. Telok, 4. Aluru, 6. Ozüng,

8. Emk, 9. Kin, 10. Teti, 12. Süir,

13. Jen, 14. Ola, 16. Talak,

17. Mazük.

LANGTSÜNGLEN :

1. Tenükjang, 2. Luden,

3. Kiochtsü, 5. Lenti, 7. Tajangzük,

11. Teronem, 12. Sempa,

13. Jahaz.

NAI-A YA METETTER MA

Scotland nung alima nung tidal turbine tashi taittiba amenokogo. Full capacity nung iba yagi tzüyim tüzsem ajanga dang kibong 2000 dak tema nem power agütsütettsü.



Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

1. Tenüng :
 2. Tasoba anogo :
 3. Küm : 4. Class :
 5. School :
 6. Talidak :
 7. Salem osang :

Tepela
Tasoba Anogo

**Senapati Police-i ILP malir non-local 541 meyipa yok****Imphal, Luroi/August 24**

(Agencies): Manipur nung ozüng alema arua alirtem putettsü atema jenjang agiba mapang Senapati District Police-i non-local tem 3,500 dak tema asadanga sülen Inner Line Permit System (ILP) nung aibelenba atema nisung 541 meyipa yokogo.

Verification drive ya Mao nung agi, koba Nagaland den arrtsü nung lir, ta ketdangsürtemi metetdaksü.

Ozüng alema arur alirtem aser bendangertem kuli kakat tejangja bena malirtem jangjatsü atema inyakyim ka iba ita tetenzüklen nungi Senapati District ajunga nung Senapati

District Police-i ayongzüka agia arudar.

August 7 nungi taoba hopta asem tsünga Senapati Police-i nisung 3,559 asadangogo aser parnok rongnung nisung 296 ket nung ILP maliasü aser nisung 237 ILP expire sür liasü aser aayangi arur tebur chanu ti arishi küm agi matongba agi Mao gate nungi meyipa yokogo.

ILP malirtem aser expire sür alirtem nem Mao gate ILP counter nung ILP agütsüogo mesüra expire sür alirtem yanglushitsüogo. Tang tashi nung ozüng alema arur aliba immigrant ka danga puteta mali.

Iba inyakyimya shishilembadak, non-local tem alidak, National

Highway-2, Maram-Peren lenmang, Tadubi-Tolloi lenmang aser tanga yimtsüngtem sendaktepba lenmangtem nung benoka inyaka liasü.

Maram-Peren lenmang ajanga ozüng alema aruba immigrants tem meita atatsü atema Tamphung nung Senapati Police aser 4th IRB densema reinforced team ka 24×7 amenoka tokja lir.

SP Senapati SM Zaib Zakir, Addl. SP (NH) aser tanga ketdangsürtemi Tamphung semdanga inyakyimtem asadangogo. Iba sentong ya meneni benoka inyakyonga aotsü, ta ketdangsürtemisa metetdaksü.

India nung CM takartiba rongnung Khandu tanabuba lir**Guwahati, Luroi/August 24**

(Agencies): Arunachal Pradesh Chief Minister Pema Khandu ya India nung chief minister takartiba rongnung tanabuba lir. Pa indang kiojen aser alirongsen crore 332.56 lir, ta Association for Democratic Reforms (ADR) indang report ka ajanga metetdaksüogo.

CM takartiba list nung Andhra Pradesh Chief Minister Chandrababu Naidu temaba jenjang nung lir. Pa indang kiojen aser alirongsen crore 913 lir.

Assam Chief Minister Himanta Biswa Sarma tekububa jenjang nung lir aser pa indang rongsen crore 17.27 lir. Tanga state chief ministers tem indang rongsen iba report nung tejangja agüja lir.

List nung Karnataka indang Chief Minister Siddaramaiah tasembuba (51.93 crore) jenjang nung lir aser Nagaland Chief Minister Neiphiu Rio pezübuba nung lir. Pa indang rongsen crore 46.95 lir.

Meghalaya CM Conrad Kongkal Sangma-i pa ket nung rongsen crore 14.06 aliba

sangdongogo aser Tripura Chief Minister Manik Saha ket nunga rongsen crore 13.90 lir.

Report ajanga ashiba agi, ajak dang tekübokba jenjang nung alibaji West Bengal indang Chief Minister Mamata Banerjee lir. La ket nung rongsen lakh 15.38 lir.

ADR aser National Election Watch-i tang linük nung chief minister 30 pronglai peisasa nangzükba affidavit dak ajemdaker iba data renemogo. Item affidavit tem ya taoba election magi tsünga file süa liasü.

Arunachal nung temesepba mozü shibelener ana apu**Itanagar, Luroi/August 24**

(Agencies): Arunachal kübok Chimpu nung police-i temesepba mozü shibelenba atema kaketshir lenir aser osangbener ka densema nisung ana puogo.

Aija alisang ana ya All Nyishi Students' Union (ANSU), research and documentation secretary William Tana Tara (27) aser H Sector, Itanagar nung alir Biki Phukan (28) ta jangjaogo. William ket nung APN Live indang press ID card-a ka ngutetogo.

Itangitertem nungi osang tejangja angazükba sülen police temi Hokolbarnü Chimpu check post nung Grand Vitara temesung ka sota liasü. Ketdangsürtemi heroin vials ter (gram 2.5), vial tazüng pezü, sen, press ID card ka, Tara ket nungi mobile phone ka ngutetogo. Tena



senzüa aliba garia sota yuogo.

Itanagar SDPO Kengo Dirchi, Itanagar Police Station OC Inspector N Nishant, aser Itanagar SP Jummar Basar nungeri achaayanga iba meita aoba sentong ya benoka inyaka liasü.

Narcotic Drugs and Psychotropic Substances (NDPS) Act kübok section tapet dak ajemdaker Chimpu police station nung ken o ka benokogo aser ken o taliba jangjatsü atema bushisügang tenzükogo.

Ukraine-i maneni Russia den raratsü: Tir Zelenskyy

Kyiv, Luroi/August 24 (Agencies): Linük nüchiso anguba anogo nung linük den jembidang, Ukraine-i maneni pei nüchiso asoshi raratsü, ta Tir Volodymyr Zelenskyy-i ashi.

"Asenoki yimjung ka nüngdaker, asen sasa asen tarutsü tia asoshi telemtetba agitetba yimjung nüngdaker. Yimjung alitsü ayongzükba mangashir, anungji Ukraine-i maneni Russia den raratsü," ta pai ashi.

"Ukraine-i ano takok mangu, saka tamakoka majuru," ta pai ashi.

Ukraine-i yasüng Russian power aser energy facilities nung amak aser drone amshia amakba ajanga anüolen Kursk region nung nuclear power plant ka nung mi adok, ta Moscow-i ashiba sülen Zelenskyy-i iba o ya ashi.

Nisung yiruba meliasü aser mi ya kanga kera remseptet, ta iba plant indang press service ajanga Telegram nung ashi. Iba mapang transformer ka raksa, saka radiation levels bo junga dang lir ta ashi.

United Nations indang International Atomic Energy Agency (IAEA) ajanga iba nuclear plant nung mi adokba osang angazüka lir aser mapang ajak nung nuclear facilities ajunga kumzüka ayutsüla ta ashi.

IAEA ajanga Russia aser Ukraine dang iba rara nung nuclear facilities temeket nung mamaktsü aiben ayongzüka arur.

Soviet Union nungi 1991 nung nüchiso sangdongba temaitü Ukraine yimtiba Kyiv nung Independence Day munga liasü.

Iba anogomung nung Canada Ato Kilonser Mark

Carney shilem agia St Sophia's Cathedral nung nüburtem den Zelenskyy-i jembidang pa sülen nokdaka liasü.

"Ni kanga tongmelang aser tongtipang o ya shiner: Canada teti Ukraine den tongpu apua nokdaksü," ta Carney-i ashi.

September ita tashinung Ukraine nem Canadian dollars \$1bn (£534m) jenjang drones, ammunition aser armoured vehicles agütsütsü, ta pai ashi. Ibai July ita pai teyari agütsütsüb sangdongba tesadang ka dak tema alitsü.

Iba sentong nung US envoy Keith Kellogg-a liasü, shiba nem Zelenskyy-i Order of Merit sempet agütsü ta ashir.

Zelenskyy-i pa aser US Tir Donald Trump dang parnoki yariba asoshi pelar ta ashiba sülen Kellogg-i Zelenskyy dang "Asenoki ibai mapa kuma inyaktsü," ta shia liasü.

Zelenskyy indang chief of staff Andriy Yermak-i Deobarnep Telegram nung, "Iba tongtipang anogo - Ukraine indang Independence Day - nung asen tembar temi yariba aseni angatetba ya kanga tongtipang lir. Aser Canada teti asen ten nokdaker."

Kasa mapang Zelenskyy-ia shiti ka lemsatep, koba King Charles ajanga Ukraine nunger dang salem shiokba indang liasü.

"Ukraine nunger dak raksatsütsü makokba tanüla aliba atema ni kanga sakloker. Teti asoshi yimjung atema asen linüktem külemi inyaktsü teimla lir," ta King Charles-i zülü.

King Charles-i o tajung ashiba ya tang ama rara mapang asen nüburtem asoshi ajungmesoba mapang ka lir, ta Zelenskyy-i ashi.

Iba anogomung nüngtem nung Downing Street temalen

Ukraine nunger nisan angutsü ta UK sorkaria ashi.

UK Armed Forces ajanga Ukraine nunger nem sepai training agütsüba Operation Interflex ya 2026 küm tatem tashibo alitsü ta Ministry of Defence ajanga ashi.

Norway-ia Ukraine nem sen 7 billion kroner (£514m; \$693m) jenjang air defence systems agütsütsü ta Deobarnü sangdong.

"Germany den külemi Ukraine nem tashi tulu air defence systems agütsür," ta Norway Ato Kilonser Jonas Gahr Store-i sangdong ka nung ashi.

Linük ana yagi Patriot systems ana den missiles alitsü asoshi senotsü teyari agütsür aser Norway-i ano air defence radar aliba nunga yarir.

Deobarnüsa Ukraine aser Sweden nati joint defence production alitsü mulungtepogo ta sangdong, aser iba ya ajanga Swedish rearmament tashi itshitsü aser Ukraine armed forces temi nüngdakba peritsütsü, ta Sweden defence minister ajanga ashi.

"Sweden nung aliba factories atema Ukraine-i technology lemsateptsü aser agütsütsü aser Sweden nung külemi yangluba defence oset tem Ukraine dangi yoktsü," ta Pål Jonson-i X nung ashi.

Honibarnü Russian sepaitemi Ukraine anüdoklen Donetsk region nung yimtsü ana agiogo ta ashi.

Russian sepaitemi meilongi rongsen aser nübu jenti lalua Ukraine anüdoklen takok nguyonga arur aser tang Ukraine indang litsü shilem 20 shi par kübok lir.

Russia-i February 2022 nung tashi ajak amshia Ukraine amak tenzük.

MULUNGNEN O

"Aser aji tamasa aliba ama auyiji ali-i meyiper, aser tanelajibo tagütsüsang Tsüngrem dangisa shilangtsü"
- Sayutsüngir 12:7



ASO :
6th February 1969

ASÜ :
18th August 2025


Asür T. Alemchila Jamir, Longjang Village, kinunger temi la shirang dang aser akümlir wadang tembangba mapang nübu, sarasadem aser rongsen agi yariba kija, kibong, arogo aser lokti tentet balala dang ozü temulung taroktiba nungi pelaba lemsateper.
Ner mapa tajung asoshi nenok kija shia dang pelaba meshitetba asoshi kanga sasar, saka Tulusang Tsüngremi nenok ajak mulamushia moatsütsü ozü sarasadem.
Onoki item dang alakteta pelaba lemsateper:
1. District Evaluation Officer and staffs, District Evaluation office Mokokchung.
2. Dr. Akumnaro (M.D) and her team at Faith hospital Dimapur.
3. Mr. Viki. Sema (Ward boy) Faith hospital Dimapur.
4. Ms. Imolangla Mokokchung.
5. Rongpangmen Baptist Arogo.
6. Mokokchung Town Baptist Arogo.
7. Neighbours from Mon Bosti and Mokokchung.
8. Longmisa Senso Telongjem Mokokchung.
9. Longmisatsur Telongjem Mokokchung.
10. Longjang Senso Telongjem Mokokchung.
11. Longjangtsur Telongjem Mokokchung.
Temeim kinungbo, tebu, adianu, kinunger aser anükapang.

Office of the
Mangmetong 'A' Khel Senso Mungdang
P.O. Mokokchung -798601, Nagaland

SANGDONGER

Mr. Temjennungsang Kichu (Chungtia), pai Mangmetong 'A' Khel Senso raising fund sen apua aliba magütsütsü ta ashiba dak ajemdaker tanü 22.8.2025 anogo Mangmetong 'A' Khel Senso lenla senden mena telemtetba yamai sangdonger.
1. Mr. Temjennungsang Kichu aser par kibong Mangmetong 'A' Khel nung tetsüng ajemoktsü memelar.
2. Mangmetong 'A' Khel Senso shinga par kidangi maotsü. Iba telemtetba nung shibai aibelendir pa/la sobaliba tapet agi merenshitsü.

Sd/-
Imtiakum Tzüdir
President
Mangmetong 'A' Khel Senso Mungdang


B. Watitemjen
General Secretary

OFFICE OF THE
MONGSENYIMTI VILLAGE COUNCIL
Rionsanger Putu
B.P.P Mongsenyimti, P.O. Chuchuyimlang - 798614
Dist : Mokokchung, Nagaland.

NÜNGSANGDI YIMYIM

Lenla ajak nung Naga nübur aser sorkar tesensen melidaktsüi len anir takotet Süngratsü nangpong Wb. Sentianger Imchen IAS ajanga Nagaland Chief Secretary menden ajangzükteta asen Naga nunger tenzüksü jenjang tongtetba nüngsangdi ola Mongsenyimti Rionsanger Putu ajanga ayimoktsür.
Terenmetet lenir lenisüba nung asen Naga lima tali telongjemba aser terenlok nung tejakleni asameyanga anitsü Tsüngremi lenir nem shisatsü aser anema aliba taküm, arishi moatsütsü onok tamang sarasadem.

Sd/-
(AOSUNGIT)
Chairman
Village Council Mongsenyimti

Sd/-
(MAPUTEMJEN)
Secretary
Village Council Mongsenyimti

Nigeria nung jihadists 30 dak tema tepset

Abuja, Luroi/August 24 (Agencies): Nigeria indang mitkari linük northeast tsütsü Cameroon den arütsülen tayimtsü amshia amakba mapang jihadists 35 tepset, ta sangdong ka nung ashi.

Jihadists temi ali nung aliba sepaitem amaktsü merangba aridoktsü mechi tesem pezü nung amak, ta mitkari ashi.

Nigeria nung jihadists teloktem aser mapa tamajung inyakba telok balala den küm ter dak tema rara arur, kong tamangba yimsü tsütsü telok balala tsüngta raraba aser senotsü mechitsü mechi nisung pua bener aoba kanga lir.

Honibarnü taoba sorkar minister tem, shishilembar aser civil society activists densema Nigeria nung tejangja telok kati sangdong ka agütsüba nung, linük nung yimjung-tesunep lir ta sangdonga liaka Nigaria tesem kar nung raradang ama nisung tepseter, ta tebilemetsü lemsatepa liasü.

Iba telok yagia Amnesty International ajanga May ita report ka athishia liasü, kong küm ana tejakdang Bola Tinubu tir akumba sülen nisung 10,217 tepsetogo ta shia liasü.

PArnoki Presidential Task Force ka kumteta yangji Boko Haram aser iba telok nungi razüka aoba Islamic State West Africa Province (Iswap) tali akumba densema rara balala tatem kati arudaktsütsü asoshi tashi agütsütsü ashi.

Nigeria northeast tsütsü ita ti nung telungpur nisung 600 jungnüa tepsetogo, ta taoba hopta army temi shia liasü. Iba osang telok balakai jangjatsüba mali. Nigerian Air Force ajanga maneni ali nung aliba sepai nem teyari agüja northeast nung jihadists amenoka aliba tesem loksatsütsü ta ashir.

Iba rara nung nisung 35,000 dak tema tepsetogo aser nisung million ana dak tema pei ki yutsür tesem balala nung jenshia lir, ta UN ajanga ashir.

Cameroon aser Niger den arütsü anasa Nigeria nung taküm jihadists temi 15 ben amakba osang tejangja lir, ta Institute for Security Studies think-tank ajanga ashir.

Jihadists temi army alidak amaktsü asoshi commercial drones tem yanglushir amshir aser mitkar temi sepai tali yoksemtsü tasak, ta ashi.

Ita tetenzüklen US State Department ajanga Nigeria dang sen \$346m (£256m) jenjang nok-nü ayoktsü melaogo.



Islamabad, Aug. 24 : Prime Minister's Initiative for Capacity Building of 1,000 Agricultural Graduates in China sentong kübok Islamabad, Pakistan nung batch tanabuba kaketshir 300 tepila sentong nung kaketshir dena aliba noksa nung angur. Pakistan Ato Kilonser Shehbaz Sharif-i parnok dang China-i oa China nunger yimyatam angazüka linük aluyimba sector tajungba kuma melenshitsü ayongzüka liasü.

NCA-i North East Zone preparatory camp host asü



Dimapur, Luroi/August 24 (TYO): Duleep Trophy 2025-26 atema August 18 nungi 24 tashi North East Zone team Preparatory Camp Nagaland Cricket Association-i kanga takok ngua host süogo. Tang agi tanebenbuba NCA-i iba asayamung atema camp host süogo aser iba ajanga India domestic cricket landscape nung Nagaland shilem taliba akümbsa sayur.

Iba camp ajanga Central Zone den August 28 nungi 31 tashi BCCI Centre of Excellence, Bengaluru nung masaya tsüingda North East Zone squad nem training agitsü atema sabang tajung ka agütsüogo.

Iba asaya ya North East Zone team atema tetendangba tulu ka asütsü, kechiyong Central Zone team nung Dhruv Jurel (Captain), Rajat Patidar, Kuldeep Yadav, Deepak Chahar, aser Khaleel Ahmed nunger amala India team nungi asayaba cricketer tem densema lir.

Duleep Trophy ya India nung first-class cricket asayamung

tongtibang rongnung ka lir, kong zonal team tem anogo aika asayba asaya nung tokteper. Iba asayamung ajanga sempet aketba asayartem nem parnok sempet sayatsü atema maongka agütsür aser national selector

tem nema tarutsü nung Indian cricket team atema asayartem jangja ayutsü maongka agütsür.

Iba asayamung yagi India domestic cricket structure tashi itshidaktsür aser lanur asayartem aniteter.

North East Zone team nung asayartem:

SR	Tenüng	State association
1	Jonathan Rongsen - C	Nagaland
2	Akash Kumar Choudhary - VC	Meghalaya
3	Sedezhalie Rupero	Nagaland
4	Ashish Thapa	Sikkim
5	Hem Bahadur Chetri	Nagaland
6	Jehu Anderson	Mizoram
7	Arpit Subash Bhatewara	Meghalaya
8	Pheiroijam Jotin Singh	Manipur
9	Palzor Tamang	Sikkim
10	Techi Doria	Arunachal
11	Ankur Malik	Sikkim
12	Yumnam Karnajit	Manipur
13	Bishworjit Singh Konthoujam	Manipur
14	Aryan Borah	Meghalaya
15	Lamabam Ajat Singh	Manipur
Support staff		
1	Anant Rangarao - Head coach	Arunachal
2	Sonam Palden - Asst coach	Sikkim
3	Mowalong Kichu - Physio	Nagaland
4	Vikash Singh - S&C Coach	Meghalaya
5	Ngangbam Singh - Masseur	Manipur
6	Raj Kumar - Team manager	Mizoram.

Animesh Kujur-i asemtepba nung otsü tasen ka yangluogo



Luroi/August 24, 2025 (Agencies): Asian Championships bronze medallist sprinter Animesh Kujur-i otsü tasen ka yanglua pa India nunger tebur asemteper rongnungi World Athletics Championships atema qualify asüba mezüngbuba asayar kümogo.

Animesh-i, National Inter-State Athletics Championships nung alizüing second 20.63 nung tongteta Tokyo nung iba asayamung atema qualify süogo aser India nunger tebur asemteper rongnung World Championships nung asayaba mezüngbuba asayar akümtsü.

Taküm Animesh-i 100m aser

200m naprongla nung national record tasen yangluogo aser Asian Athletics Championships nunga bronze medal nguogo.

Ano pa Monaco Diamond League nunga U23 200m asemtepba nung shilem agiogo.

"Iba season atema ni kanga pelar. Season tetenzüklen national record yanglutsü ta onoki mimlai liasü. Pai takok tajung anguba sülen pa World Championships atema qualify süogo, koba takok tulu ka lir," ta Animesh indang coach Martin Owens-i ashi.

World Athletics Championships nung India nunger rongnungi mezüngbuba race-walker Siri Chand Ram-i shilem agi. Pa ya 1982 Asian Games gold medallist liasü. Taoba mapang long-jumper Mercy Kuttan-ia 1983 küm Helsinki nung iba asayamung tenzükba mapang shilem agiogo.

Animesh taküm February ita Uttarakhand nung National Games nung asaya-a tenzük.

National Games sülen pa Kochi nung Federation Cup nung asaya aser iba mapang 200m national record tasen yanglu.

Korea nung Asian Athletics Championships asayaba mapang Animesh-i 200m national record yanglushia alizüing 20.32 second nung tongteta liasü.

Kasa mapang nung Animesh-i ano Gurindervir Singh, Manikanta aser Amlan Borgohain nunger den 4x100m relay national record tasen ka yangluogo. Parnoki alizüing 38.69 seconds nung tongteta liasü.

Iba sülen pa Europe nung oa asaya aser iba mapang Dormia nung pai 100m asemtepba nung alizüing 10.18 seconds nung tongteta national record tasen ka yanglua liasü.

Maneni Animesh, Monaco Diamond League U23 asemtepba nung shilem agi aser Odisha nung World Athletics Continental Tour bronze meet aser Inter-State Championships atema India-i meypa aru.

Cheteshwar Pujara cricket asaya nungi anisüngzüker

Luroi/August 24, 2025 (Agencies): India nunger Test batters tem rongnung ajaki akümtsübuba aser temulung kanga alemba asayar Cheteshwar Pujara-i pa cricket asaya format ajak nungi anenba metetdaktsüogo.

Arishi küm 37 tain asayar yagi X ajanga iba osang lemsatep aser linük tenüng nungi asayatsü maongka anguba atema kanga pelaba lemsatepa liasü.

"India jersey semer, linük naklo ken tena aser ground-i aiba shi takokba tashi tajungtiba asayatsü merangba ya o agi rasa ashtisü makoker. Ajisüaka ajak tatembang ka dangi arutsüla ta ashirji ni temulung nung tenüingsang agi sünger Indian cricket asaya format ajak nungi anisünzüktsü telemtetba agiogo," ta pai ashi.

Pujara Test asaya nung mezüngbuba 2010 küm Australia den asaya aser iba sülen India tenüng nungi Test 103 nung asayaogo. Pai 43.61 average nung ajak senteper run 7,195 yanglu, kong centur19 aser half-century 35 yangluba densema lir. Test asaya nung

pai run timtiba yanglubaji run 206 yangluba asütsü. Ano pai One Day Internationals pongu nung asayaogo aser iba mapang run 51 yanglua liasü.

Pujara ya kanga atasa asayaba atema kanga nüngtugu lir aser India team bendanglen oa asayaba mapang pai aiben team batting jenjang yangluja aruogo. India team-i Australia aser England nung oa takok ngua asayaba mapang pai tongtibang shilem agia liasü.

Arishi küm 37 tain asayar ya Test asaya nung tatemsä 2023 küm Australia den World Test Championship final nung asaya. Iba sülen pa India Test team nungi khen danga masaya saka domestic cricket nung maneni kanga junga asaya aruogo.

Paisa, pa indang career tepeyong pa nongita yariba atema pa indang teammate, coach aser fan tem dang kanga pelaba lemsatepa liasü. Pujara-i kanga atasa-a asayaba den pa asayaba yimya tajung aser pa dak temulung alemtsüsa asayetba ajanga pa asaya nungi anenaka lanur asayartem maneni ajungmesotsü.

Asian Shooting C'ship: Aishwary aser Adriyan nati gold angu



Luroi/August 24, 2025 (Agencies): India nunger asayar Aishwary Pratap Singh Tomar-i tang Shymkent, Kazakhstan nung asaya aliba 16buba Asian Shooting Championship Rifle/Pistol/Shotgun nung Deobarnü men's 50m rifle 3 positions event nung point 462.5 ngua gold medal nguogo.

Pai tang agi tanabenbuba iba continental championship nung gold medal nguogo aser paisa, silver aser bronze medal ka ngur lir. Iba asaya nung China nunger asayar Wenyu-i silver aser Japan nunger Naoya Okada-i bronze medal ngua liasü.

Kasa mapang nung India nunger asayar Adriyan Karmakar-i junior men's 3P asaya nung gold medal ngua Asian junior record tasen ka yangluogo. Pai point 463.8 ngua liasü.

Tebur 3P asaya nung India nunger asemprongla final-i ai aser Aishwary-i Kneeling, Prone aser Standing positions nung point 584 ngua pa temaba jenjang nung qualify asü aser Chain Singh (582) pezübuba aser world championship bronze medalist Akhil Sheoran (581) tenetebuba nung qualify süa liasü.

Aishwary Tomar, Chain Singh aser Akhil Sheoran nunger senteper point 1747 ngua parnok team asaya nung silver medal ngua liasü. Parnoki gold medal anguba China team point asem agi dang memenep. Team asaya nung Korea team-i bronze medal ngua liasü.

2025 Asian Shooting Championships nung tang tashi nung India nunger asayartemi gold pongu, silver ana aser bronze medal trok ngua lir.

BILEMDANGANG

"Süngjema angatsüji temeim indang mezüngbuba teinyaktsü lir"